

ADYAYA I

PAMAHBAH

1.1 Dadalan Pikobet

Basa Bali ring aab jagat sakadi mangkin sampun sayan ngamolihang uratian antuk guru wisesa, utamanyane ring Pemerintah Provinsi Bali, uratian punika marupa usaha sajeroning nincapang paplajahan basa Bali. Punika kajantenang taler antuk Wisnu msl. (2023:2) maosang indik Pemerintah Daerah inggih Kabupaten/Kota miwah Provinsi Bali sampun urati sajeroning nincapang paplajahan basa Bali. Kawentenan punika kacihnayang antuk kebijakan sane mapaiketan ring paplajahan basa Bali. Mapaiketan ring punika, pemerintah kabupaten/kota miwah provinsi nyantenang paplajahan basa Bali kalaksanayang ring sekolah sakadi kajantenang ring Peraturan Gubernur Bali Nomor 20 Tahun 2013 indik *Bahasa, Aksara, dan Sastra Daerah Bali Pada Pendidikan Dasar dan Menengah. Kebijakan* puniki maosang indik *Bahasa, Aksara dan Sastra Bali diajarkan pada semua jenjang pendidikan dasar dan menengah sebagai mata pelajaran di Provinsi*. Nganutin pamargi punika, *Bupati/Walikota dapat mewajibkan satuan pendidikan untuk mengajarkan Bahasa, Aksara dan Sastra Bali minimal 2 jam pelajaran per minggu* (BD PROVINSI BALI, 2013 (20)). Tiosan ring punika, wenten taler Peraturan Gubernur Nomor 80 Tahun 2018 indik *Perlindungan dan Penggunaan Bahasa, Aksara, dan Sastra Bali serta Penyelenggaraan Bulan Bahasa Bali* sane mapaiketan ring paplajahan informal basa Bali sajeroning pakraman.

Uratian guru wisesa sajeroning ngajegang basa Bali taler kajantenang antuk *pengangkatan* guru basa Bali. Pamargi punika pinih riin kalaksanayang antuk Pemerintah Kota Denpasar sajeroning Dinas Pendidikan Kepemudaan dan Olahraga (Disdikpora) Kota Denpasar ring warsa 2018. Mapaiketan ring punika, Wisnu msl. (2021) nyantenang indik Disdikpora Kota Denpasar ngamargiang *pengangkatan* guru basa Bali ring Sekolah Dasar (SD) miwah Sekolah Menengah Pertama (SMP). Pamargi punika kalanturang antuk kabupaten sane tiosan minakadi Kabupaten Badung miwah Klungkung. Punika taler Pemerintah Provinsi Bali sajeroning Disdikpora Provinsi Bali ngamargiang *pengangkatan* guru Bahasa Bali ring Tingkat SMA/SMK. Sakadi kajantenang antuk Wisnu msl. (2023:2) kawentenan puniki kakukuhang antuk *penambahan* sekolah negeri ring undangan SMP, *penambahan kuota* guru miwah kawentenan paubahan *status* guru sadurungnyane guru kontrak dados guru kontrak Pegawai Pemerintah dengan Perjanjian Kerja (PPPK), *penambahan rombel* (kelas) ring undangan SD, taler kawentenan makudang-kudang guru bahasa Bali ring undangan SD miwah SMP sane sampun *purna tugas* (*Pensiun*). Kawentenan *pengangkatan* guru Bahasa Bali prasida ngicenin galah miwah genah anggen nglimbakang paplajahan basa Bali utamanyane ring Kota Denpasar. Nglimbakang paplajahan basa Bali ngawit saking nglimbakang kawagedan guru basa Bali antuk Disdikpora Kota Denpasar pinaka pamucuk. Mapaiketan ring punika, guru basa Bali sinamian sapatutnyane taler kaicenin pelatihan-pelatihan kaanggen nincapang kawagedan guru ri kala ngicenin ajah-ajahan ring sisia.

Kawentenan pelatihan guru puniki mabuat pisan, mangda guru prasida nglimbakang paplajahan basa Bali ring sekolah. Mapaiketan ring punika, pateh

sakadi sane kajantenang ring Dewi (2022) sane maosang indik pelatihan guru puniki pastika mabuat pisan antuk nglimbakang tata cara ngajahin basa Bali ring sekolah mangda para sisia meled mlajahin basa Bali nganutin panglimbak sakadi mangkin. Kawagedan guru ri kala ngajahin ring sekolah prasida ngiusang pikayunan sisia antuk malajahin basa Bali. Kawentenan punika mapaiketan sajeroning tata cara guru nyobyahang materi, napimalih wenten sisia sane durung tatas nganggen basa Bali. Sakadi sane kajantenang antuk Purnami, msl. (2024) “Tata cara ngajahin sane durung nganutin aab sakadi mangkin (*inovatif*) ngawinang para sisia meweh nguratiang paplajahan basa Bali sane kaajahin olih guru”. Paplajahan basa Bali ring aab jagat sakadi mangkin sampun kabaos *membosankan* antuk para sisia makasami. Sakadi sane kajantenang ring Widiastari (2019) “sisiane makasami mangkin nenten meled mlajahin basa Bali mawinan mrasa jekeh, males, miwah kabaos *membosankan*”. Mapaiketan ring parindikan punika, kawentenan pelatihan guru mabuat pisan ri kala nglimbakang kawagedan guru sajeroning makarya modul miwah ngicenin ajah-ajahan ring sisia sajeroning paplajahan basa Bali.

Pelatihan majeng ring guru antuk Disdikpora Kota Denpasar sampun ketah kalaksanayang, nanging durung nincap ring paplajahan basa Bali. *Pelatihan* sane kalaksanayang antuk Disdikpora Kota Denpasar kajantenang antuk Pelatihan Aksara Bali Berbasis Teknologi ring warsa 2010 sane matetujon nyobyahang digitalisasi aksara Bali sajeroning sisia tur kasarengin antuk Yayasan Bali Galang. Kawentenan *pelatihan* puniki durung prasida nincapang kawagedan guru sajeroning panglaksana paplajahan basa Bali ring kelas. Matiosan ring punika, Disdikpora taler nglaksanayang *pelatihan* majeng ring gutu, sakadi *pelatihan* guru

IPA, Matematika, Bahasa Indonesia, Penjasorkes miwah PPKn. Punika kajantenang antuk silih tunggil parikrama *Pelatihan Matematika Gasing (Gampang, Asik, dan Menyenangkan)* majeng ring guru matematika ring Denpasar Selatan (Disdikpora, 2024). Punika taler Disdikpora Kota Denpasar ngamargiang lokakarya (workshop) mapaiketan ring nglimbakang kawagedan guru PAUD miwah guru IPS ring warsa 2023. Pikolih ring *pelatihan* punika sampun prasida kaanggen sajeroning paplajahan ring kelas.

Pelatihan guru Bahasa Bali ring Kota Denpasar, utamanipun ring Tingkat SMP ketah kalaksanayang antuk Musyawarah Guru Mata Pelajaran (MGMP). Panglaksana pelatihan antuk MGMP Bahasa Bali Kota Denpasar kadagingin antuk ngwangun kurikulum tur mligbagang indik tetujon paplajahan sane ketah kabaos TP/ATP. Pikolih saking *pelatihan* utawi *workshop* marupa modul ajar basa Bali. Kawentenan punika durung jangkep ri sajeroning kawagedan guru ngaryanin tur ngicenin daging ajah-ajahan (*materi ajar*) antuk para sisia sinamian ring kelas. Mapaiketan ring punika, Wahyudi (2022:52) maosang nglimbakang daging paplajahan mabuat majeng ring para guru miwah sisia ring paplajahan santukan prasida kaanggen sepat sajeroning pangrencana, panglaksana, miwah panureksa paplajahan. Punika nyantenang kawagedan guru basa Bali mapaiketan ring daging paplajahan kabaos kirang.

Kirangnyane pelatihan guru basa Bali ngamedalang pikobet sajeroning panglaksana paplajahan basa Bali ring sekolah. Pikobet sane karasayang antuk guru basa Bali minakadi nenten mrasidayang nglimbakang paplajahan basa Bali nganutin aab jagat tur kabaos monoton. Pikayunan para sisia taler sayan-sayan rered antuk mlajahin basa Bali. Punika taler kajantenang antuk Purnami, msl (2024)

“akeh sisiane ring SMP sane kabaos heterogen tur arang mebebaosan nganggen basa Bali”. Kawenten punika ngawinang guru basa Bali sinamian patut nincapang kawagedan sajeroning daging paplajahan malarapan pelatihan guru sakadi sampun kajantenang sadurungnyane. Mapaiketan ring punika, guru basa Bali ring Kota Denpasar patut nyarengin pelatihan indik punika.

Pelatihan guru basa Bali indik daging paplajahan kajantenang sajeroning Program Revitalisasi Bahasa Daerah (RBD). RBD kalaksanayang antuk Balai Bahasa ring wewidangan Kementerian Pendidikan dan Kebudayaan (sane mangkin Kementerian Pendidikan Dasar dan Menengah). Parikrama puniki taler pinaka silih tunggil program saking Balai Bahasa Provinsi Bali (BBPB) sane ngangganin Badan Pengembangan dan Pembinaan Bahasa (BPPB) Kementerian Pendidikan Dasar dan Menengah ring wewidangan Provinsi Bali. Kawenten RBD punika kakepah antuk makudang-kudang parikrama, inggian punika (1) pelatihan guru utama, (2) pengimbasan guru dan siswa, (3) festival tunas Bahasa Ibu (FTBI) sane kalaksanayang antuk kabupaten/kota sajabag Bali, miwah (4) kemah cerpen/puisi. Parikrama punika kajantenang sajeroning Pedoman RBD sane kamedalang antuk BPPB ring warsa 2022. Sajeroning pelatihan sane kalaksanayang ring RBD sampun nganutin kurikulum pepelajahan basa Bali ring sekolah. Mapaiketan ring punika, pelatihan sajeroning RBD prasida kaanggen nglimbakang kawagedan guru miwah nglimbakang paplajahan basa Bali ring sekolah.

Kautaman RBD sane mapaiketan ring daging paplajahan basa Bali kajantenang sajeroning pamargi pelatihan guru utama. Parikrama puniki matatujon nglimbakang kawagedan para guru mangda prasida nglimbakang paplajahan basa Bali sayan ngamecikang, indike punika kajantenang antuk parikrama *pengimbasan* sane

kalaksanayang antuk guru SD miwah SMP sajebag Provinsi Bali. Sakadi kajantenang antuk Purnami msl. (2025:614) “guru pinaka panuntun pikayunan sisia sajeroning nglaksanayang paplajahan pastika ngwangun tata titi paplajahan sane ngulangunin, *strategi* paplajahan sane becik, taler paiketan sane rumaket pantaraning guru miwah siswa prasida nincapang pikayunan sisia nglaksanayang paplajahan.” Kawentenan punika prasida nglantur sajeroning nglimbakang *materi ajar* puniki ring pangrencana (*perangkat pembelajaran*), panglaksana (*metode pembelajaran*), miwah panureksa (*evaluasi pembelajaran*). Mapaiketan ring punika, salanturnyane pacang katureksain indik panglaksana tur panadosan RBD sajeroning nglimbakang kawagedan guru basa Bali tingkat SMP, utamanipun ring Kota Denpasar.

Tatilikan puniki kalaksanayang ring undagan SMP mapaiketan sajeroning daging paplajahan (*materi ajar*) basa Bali. Daging paplajahan ring program RBD akehan anut ring paplajahan basa Bali SMP. Sakadi sane kajantenang ring Pedoman RBD (2022) daging paplajahan sane kasobyahang ring program RBD minakadi masatua, mapidarta, ngwacen miwah nyurat aksara daerah (Bali), ngwacen miwah ngripta satua bawak, ngwacen miwah ngripta puisi Bali anyar, tur matembang (pupuh). Tetilikan puniki kajantenang ring Kota Denpasar mawinan Kota Denpasar pinaka pusat nglaksanayang program RBD. Kawentenan punika mapaiketan sajeroning panglaksana apresiasi RBD sakadi FTBI Provinsi Bali sane kalaksanayang ring Badan Penjaminan Mutu Pendidikan (BPMP) ring warsa 2023 miwah Hotel Prime ring warsa 2024. Mapaiketan ring punika, kacihnayang taler kawentenan kantor Balai Bahasa Provinsi Bali sane magenah ring Kota Denpasar.

Tatilikan asoroh ngenenin indik Revitalisasi Bahasa Daerah kamargiang olih Sugita miwah Pastika (2022) sane mamurda “*Revitalisasi Bahasa Bali Melalui Seni Pertunjukan Drama Gong*”. Pikolih saking tetilikan puniki ngenenin indik usaha sane becik anggen ngajegang basa Bali malarapan antuk pamentasan drama gong. Mapaiketan ring punika, drama gong pinaka pamentasan sane kasenengin tur rumaket ri sajeroning krama Baline sane nganggen basa Bali ri kalaning mabebaosan. Pabinayan tetilikan puniki ring tetilikan sane jagi kamargiang inggih punika Revitalisasi Bahasa Daerah kamargiang ring wewidangan informal malarapan antuk pementasan drama gong. Malianan ring punika, tetilikan sane jagi kamargiang inggih punika Revitalisasi Bahasa Daerah kalaksanayang ring wewidangan *formal* (Paplajahan basa Bali ring sekolah).

Tatilikan asoroh ngenenin indik nglimbakang kawagedan guru kamargiang olih IWG Wisnu msl. (2023) sane mamurda “Pemberdayaan Guru Bahasa Bali Jenjang SMA/SMK dalam Kebijakan Pemerintah Provinsi Bali”. Pikolih saking tetilikan puniki ngenenin indik usaha guru wisesa nglimbakang guru basa Bali sane ring SMA/SMK malarapan antuk kebijakan Pemerintah Provinsi Bali. Mapaiketan ring tetilikan puniki, wantah pangukuhan guru basa Bali miwah pangukuhan profesionalitas guru malarapan antuk sertifikasi Pendidikan Profesi Guru (PPG). Mapiketan ring tetilikan puniki, durung wenten nincapang kawagedan guru ri kala ngamargiang pangajah-ajah ring sekolah. Tetilikan sane jagi kalaksanayang mangkin “Nglimbakang Kawagedan Guru Basa Bali SMP Kota Denpasar Malarapan Antuk Revitalisasi Bahasa Daerah Balai Bahasa Provinsi Bali.

1.2 Ngrereh Pikobet

Mapaiketan ring tatilikan sane pacang kamargiang, sampun kapolihang makudang-kudang pikobet sane pacang kaselehin ring tatilikan puniki. Pikobet sane kapanggih, minakadi (1) Guru basa Bali sinamian sapatutnyane kaicenin pelatihan-pelatihan sane kaanggen nincapang kawagedan guru ri kala ngicenin ajah-ajahan ring sisia. (2) Kawagedan guru ri kala ngajahin ring sekolah prasida ngiusang pikayunan sisia sajeroning malajahin basa Bali, utamanyane ri kala nyobyahang materi. (3) Pelatihan guru ring MGMP durung jangkep ri sajeroning kawagedan guru ngaryanin tur ngicenin daging ajah-ajahan (materi ajar). (4) Kirangnyane pelatihan guru basa Bali nenten mrasidayang nglimbakang sajeroning panglaksana paplajahan basa Bali ring sekolah. (5) Kawentenan RBD Balai Bahasa Provinsi Bali antuk nincapang kawagedan guru basa Bali durung polih uratian.

1.3 Ngwatesin Pikobet

Mapaiketan ring pikobet sane sampun kapanggih, ring tatilikan puniki nenten samian pikobet punika jagi katilikin. Nganutin ring puniksa salanturanyane pikobet sane kapolihang pacang kawatesin. Tiosan ring punika, pikobet sane durung katilikin ring tatilikan puniki mangda prasida kamargiang ring galah sane lianan ngantos paripurna. Pikobet sane pacang kawatesin inggian punika (1) Pelatihan guru ring MGMP durung jangkep ri sajeroning kawagedan guru ngaryanin tur ngicenin daging ajah-ajahan (materi ajar). (2) Kawentenan RBD Balai Bahasa Provinsi Bali antuk nincapang kawagedan guru basa Bali durung polih uratian.

1.4 Bantang Pikobet

Mapaiketan ring pikobet sane sampun kawatesin, wenten bantang pikobet sane kaanggen dasar ring tatilikan puniki, minakadi:

1. Sapunapi parikrama *program* RBD Balai Bahasa Provinsi Bali mapaiketan sajeroning kawagedan guru basa Bali SMP Kota Denpasar?
2. Sapunapi panampen pamilet *program* RBD Balai Bahasa Provinsi Bali mapaiketan sajeroning kawagedan guru basa Bali Kota Denpasar?

1.5 Tatujon Tatilikan

Mapaiketan ring bantang pikobet sane sampun kapoliang, tatujon tatilikan sane jagi kamargiang minakadi:

1. Mangda prasida nlatarang parikrama *program* RBD Balai Bahasa Provinsi Bali mapaiketan sajeroning kawagedan guru basa Bali SMP Kota Denpasar.
2. Mangda prasida nlatarang panampen pamilet *program* RBD Balai Bahasa Provinsi Bali mapaiketan sajeroning kawagedan guru basa Bali SMP Kota Denpasar.

1.6 Kawigunan Tatilikan

Tatilikan puniki kaaptiang mangda mawiguna sajeroning guna widya miwah panglimbaknyane. Mapaiketan ring kawentenane punika, kawigunan tatilikan puniki marupa kawigunan pamucuk miwah kawigunan panglimbak sakadi ring sor puniki.

1. Kawigunan Pamucuk

Kawigunan pamucuk (*manfaat teoretis*) inggih punika kawigunan sane mapai ketan ring usaha nglimbakang guna widya, utamanipun ring widya basa Bali. Kawigunan pamucuk ring tatilikan puniki marupa panglimbak kaweruhan sajeroning nincapang kawagedan guru basa Bali maduluran antuk pidabdab (*kebijakan*) saking guru wisesa sakadi program RBD sane kalaksanayang antuk Balai Bahasa Provinsi Bali. Kawentenane puniki prasida pinaka sasuluh ri kala nabdabang sakancan usaha sajeroning nglimbakang kawagedan guru basa Bali.

2. Kawigunan Panglimbak

a. Majeng ring guru basa Bali,

mangda prasida kaanggen nglimbakang kaweruhan indik nincapang kawagedan guru basa Bali mapai ketan ring pidabdab saking guru wisesa. Parindikan punika prasida pacang nyantenang pikenoh ri kala nincapang kaweruhan para guru basa Bali makasami. Salanturnyane, pikayunan sakadi inucap kaaptiang pacang ngamedalang pangarsa para guru basa Bali ri kala ngamiletin sakancan usaha nincapang kaweruhan soang-soang.

b. Majeng ring sisia,

mangda prasida kaanggen nglimbakang kaweruhan sisia sajeroning paplajahan basa Bali. Parindikan punika prasida nyantenang pikenoh sane prasida kaanggen ring kahuripan. Salanturnyane, para sisia ngamedalang pikayunan sajeroning mlajahin basa Bali ring sekolah.

c. Majeng ring guru wisesa,

mangda prasida kaanggen sasuluh (*refleksi*) ring guru wisesa, pamekasnyane pemerintah Kota Denpasar. Parindikan punika mapai ketan ri

kala ngamedalang pidabdab antuk guru wisesa kaanggen nincapang kawagedan guru basa Bali. Salanturnyane, pinaka panureksa sajeroning program RBD antuk Balai Bahasa Provinsi Bali mangda sayan-sayan nglimbak.

d. Majeng ring panilik salanturnyane,

mangda prasida kaanggen imba utawi sasuluh ri kalaning ngamargiang tatilikan salanturnyane. Parindikan punika prasida nyantenang pikenoh sajeroning ngamolihang pikobet sane pateh. Salanturnyane, pinaka panureksa sajeroning tatilikan puniki.

